



Inatsisartunut ilaasortaq Naaja Nathanielsen, IA

Apeqqummut nr. 146-imut 2014-2017-imi Uuliasiornermut Aatsitassanullu periusissamut tunngasumut akissuteqaat.

25. juli 2014

Inatsisartut suleriaasianni § 37 naapertorlugu Naalakkersuisunut makkuningga apeqquteqarputit:

Postboks 1601
3900 Nuuk
Tlf. (+299) 34 50 00
Fax (+299) 32 56 00
E-mail: isi-
in@nanoq.gl
www.nanoq.gl

1.

Inuussutissarsiornermut Aatsitassaqaqnermullu Naalakkersuisup uissuumminartumik oqaatigivaa "Oliamut Mineralinullu tunngatillugu 2014-2017 iliuusissiaq" tassaasoq "iliuusissiaq naleqqussarneqarsinnaasusoq" piffissallu ingerlanerani allangortinneqarsinnaasoq. Sukutsitaata allangortinneqarsinnaanerani Naalakkersuisoq pilersaaruteqarpa iliuusissiallu qaqugu naammassivinneqarnissanik Naalakkersuisoq naatsorsuutiginnippa? Tamatumami paasinissaa innuttaasut suliffissuaqarfiullu qanoq naatsorsuutiginninnissaannut pingaaruteqarpoq.

Akissut

Qanoq naatsorsuutigisaqarsinnaanerluni innuttaasut suliffissuillu ilisimanninnissaat pingaaruteqarpoq, aammalu periusissiami immikkoortut pingaarnerit atugassarititaasullu piffissami periusissiap atuuffissaani aalajangersimapput. Immikkoortuni pingaarnerit ilaatigut tassaapput sumiiffinnut pisinnaatitsissuteqarfiusunut aalajangersimasunut atugassarititaasut, uuliasiornissamut pisinnaatitsissuteqarfissat nutaat pillugit neqeroortitsinissamut anguniakkat aamma government take-nut ilusiliat.

Taamaattorli peqatigisaanik aatsitassarsiornermut suliassaqaqarfiup ineriartortinneqarneranut avataaneersut tunngavissat qanoq sunniinersut, tamatumalu malitsigisaanik periusissiami immikkoortut assigiinngitsorpasuit piviusunnngortinneqarnissaat pillugu Naalakkersuisut isummernissaat avaqqunneqarsinnaanngilaq pingaaruteqarlunilu. Kalaallit Nunaat nunarsuarmit avatangiisumit sunniinernit immikkoorluni inissisimangilaq. Taamaattumik periusissiami anguniakkat assigiinngitsut naammassineqartarnerinik Naalakkersuisut ingerlaavartumik naliliisarnissaat pissusissamisoorpoq pisariaqarlunnarlunilu, tassanilu ilaapput peqqissutsimut suliassaqaqarfinni, isumaginninnermi suliassaqaqarfinni, attaveqarnermi assigisaannilu misissuinerit. Inuiaqatigiinni ineriartortitsinermut aamma nunarsuarmit avatangiisumut tunngatillugu Naalakkersuisut periusissiamik atuutsitsineranni aalajangersimasumi suliniuteqarfiusumilu "Uuliasiornermut Aatsitassanullu periusissiaq 2014-2017" "periusissiatut ingerlaavartumik ineriartortinneqartutut" isigisariaqarpoq.

2.

Tusarniaasitsinerup nalaani professor Minik Rosingip oqaatigivaa iliuusissiamut piffissaliussap iluani oliasiortoqalernissaa piviusorsiornerunngitsoq. Naalakkersuisut tamatumunnga isumaqataappat? Imaluunniit iliuusissianut piffissaliussat marluk takkukkumaartut iluanni ataatsimik marlunniilluunniit oliasiorfeqalernissaanik naatsorsuuteqarnertik Naalakkersuisut attatiinnarpaat?

Akissut

Uuliamik niuerutigineqarsinnaasumik piujuartussamillu nassaarnissamut periarfissanik siuarsaanissaq periusissiamut Naalakkersuisut ungasissumut siunnerfigaat. Tamanna uuliasiorluni/gassisiorluni misissuinerup iluani qaffasissumik suliaqarnerup attatiinnarneratigut pissaaq. Periusissiami siunnerfigineqarpoq piffissami periusissiap atuuffissaani agguaqatigiissillugu ukioq allortarlugu misissuilluni qillerinernik ingerlatsisoqartassasoq.

Maannakkorpiaq misissuilluni qillerinernik ingerlatsinissamut akuersissummik pinsinnaatitsissummik pigisaqartunit qinnuteqaammik tigusaqartoqarsimanngilaq.

Tamatuma saniatigut periusissiami akileraartarnermut atugarissaarnermullu ataatsimiititaliamit naatsorsuinermut assersuutit issuarneqarput, tassani takutinneqarluni uuliamik tunisassiornermik pilersitsineq Kalaallit Nunaata aningaasaqarneranut pitsaasorujussuarmik sunniuteqarsinnaassasoq.

3.

Iluamik paasisimanerpara Inuussutissarsiornermut Aatsitassaqarnermullu Naalakkersuisoq oqarmat aatsitassanut aningaasaateqarfiujumaartoq ilaatigut Kalaallit Nunaata aatsitassarsiornermi peqataanissaanut atorneqarumaartoq?

Akissut

Kalaallit Nunaata Aatsitassarsiornermi Aningaasaateqarfia pillugu Inatsisartut inatsissaat nr. 6, 5. december 2008-meersumi kapitali 4, aalajangersakkanik arlalinnik aatsitassarsiornermi aningaasaateqarfimmit nunap karsianut aningaasanik nuussisarnermik maleruagassiiviusunik imaqarpoq.

§ 6 taamaalilluni imatut oqaasertaqarpoq:

“Naalakkersuisut isumagissavaat Inatsisartut aningaasanut inatsisaannut aamma landskarsip naatsorsuutaanut atasumik immikkut aamma isumagissallugit Namminersornerusut aatsitassarsiornermi sammisaanut aningaasaliissutit, aatsitassarsiornermi sammisani aningaasartuutit kiisalu suliassat tiguneqarsimasut isumaginerinut aningaasartuutit ukiumut aningaasarsiorfiusumut ilanngutissallugit.

Imm. 2. Aningaasaateqarfiup isumagissavaa, imm. 1-imi aningaasaliissutit aningaasartuutitullu taaneqartut inatsimmi matumani malittarisassat naapertorlugit kiisalu inatsisartut aningaasanut inatsisaanni imaluunniit ilassutit aningaasaliissutinik Inatsisartut akuersisimanerat naapertorlugu aningaasaateqarfiup aningaasaataannit matuneqarnissaat.

Imm. 3. Aningaasaateqarfiup aningaasaatai imm. 1-imi taaneqartut aningaasaliissutinut aningaasartuutinullu matussusiinissanut atorneqassappata, aningaasaateqarfiup isumagissavaa, aningaasat aningaasaateqarfimmit landskarsimut

nuunneqarnissaat kingusinnerpaamik inatsisartut aningaasanut inatsisaata imaluunniit ilassutitut akuerineqarnerannit qaammatit marluk qaangiutsinnagit, siusinnerpaamilli ukiumi aningaasarsiorfiusumi pineqartumi ulloq 1. januar. Aningaasaqarnermut niuernernullu tunngasut, ilaallutik aningaasaateqarfiup aningaasaataanik aqutsinermut aningaasalersuinernullu tunngassutillit ajornartitsinnagippata, Naalakkersuisut aningaasaateqarfiup siulersuisuisa inassuteqarnerisigut aalajangersinnaapput, nuussinissamut killigititaq kingusinnerusumut kinguartinneqarsinnaasoq, taamaattorli inatsisartut aningaasanut inatsisaata imaluunniit ilassutitut aningaasaliissutit akuerineqarnerannit qaammatinik arfinilinnik kingusinnerusinnaanani.

Imm. 4. Namminersornerusut aatsitassarsiornermik sammisanut aningaasaliissutaat, aatsitassarsiornermik sammisanut aningaasartuutaat kiisalu suliassat tiguneqartut isumaginerannut aningaasartuutit ukiumi aningaasaliiffiusumi inatsisartut aningaasanut inatsisaanni imaluunniit ilassutitut aningaasaliissutini missingersuusioreneqarsimasunit ikinneruppata, aningaasat nikingassutaasut amerlaqataat landskarsimit aningaasaateqarfimmut nuunneqassapput.

Imm. 5. Landskarsip aningaasaateqarfiullu akornanni aningaasanik imm. 4 malillugu nuussineq siulersuisut aamma Naalakkersuisut isumaqatigiinnerisigut pissaaq, taamaattorli ukiumi aningaasaliiffiusumi landskarsip naatsorsuutaasa akuersissutigineqareernerini qaammatinit 6-init kingusinnerusumi pisinnaanani.

Imm. 6. Landskarsip aamma aningaasaateqarfiup akornanni aningaasanik nuussineq, Namminersornerullutik Oqartussat missingersuusiortarnerat pillugu inatsit aamma Inatsisartut Aningaasanut inatsisaat mianeralugit aatsaat pisinnaavoq.

Inatsimmut nassuiaatini nalinginnaasuni, aatsitassarsiornermi aningaasaateqarfiup aningaasaatai inatsit naapertorlugu qanoq atorneqassanersut makkuningga allassimasoqarpoq:

"Aningaasaateqarfiup aningaasaataanik atuinerup siunertanut aalajangersimasunut siunertarissanngilaa, namminersornerusut aatsitassarsiornermi ingerlanneqartunut atatillugu aningaasartuutit matussusernissaasa saniatigut, soorlu Nunaoil A/S.

Aatsitassat annertungaatsiartut nassaarineqassappata, namminersornerusut ukiuni siullerni tunisassiornermut atortussanik pisiortornermut aningaasaliissuteqartariaqassapput, suliffeqarfiit isertitaqalernissaasa tungaanut. Piffissami tassani aningaasaateqarfik aningaasanik ileqqaarsimappat, siunissami Inatsisartut aningaasanut inatsisaasa missingersuutaanni amigartoorutit pisortallu taama aningaasaliissuteqarsimanerisa malitsigisaanik taarsigassaqaqarnerata amerlaqataannik ikilisinneqarsinnaassapput.

Nalilerneqarpoq Kalaallit Nunaanni uuliasiorfimmut tunisassiornermi sanaartornermi aningaasartuutit katinneri 20-30 mia. kr.-t missaanni naleqassasut. Maanna akuersissutini Nunaoil A/S'ip 12,5 %-it pigisarai, tamatumalu nassataraa, ingerlatseqatigiiffiup uuliasiorfimmut ataatsimut aningaasaliissutit 2,5 mia. kr.-t sinnerlugit ilangiisariaqarnissaa, piginneqataassutit 12,5 %-iusut pigiinnarneqassappata.

Tamakku saniatigut Namminersornerusut aatsitassarsiornermit isertitaat Inatsisartut aningaasanut inatsisaannut nalinginnaasumik aningaasaliissutissatut tunngaviussapput. Taamaalilluni aningaasat atorneqassapput, Kalaallit Nunaanni aningaasarsiornikkut pingaarnertut politikki malillugu Kalaallit Nunaanni inuiaqatigiit

aningsarsiornikkut ataatsimut isigalugu ataavartumik pitsaasumillu qulakkeerinneqataasussanngorlugit."

Taamaattumik apeqquternut akissutitut annertunerpaatigut aatsitassarsiornermi aningaasaateqarfimmu inatsit aamma inatsisissatut siunnersuummut nassuiaatit innersuussutigissavakka.

4.

Nr.3-mi apeqqut angerneqarpat: Naalagaaffimmu peqataasitsineq Nunaminerals aamma Nunaoil aqqutigalugit pissava imaluunniit Naalakkersuisut allanik pilersaaruteqarpat?

Akissut

Apeqqummut 3-imut akissuteqaat innersuussutigineqarpoq. Taamaattorli peqatigisaanik ilisimatitsissutigineqassaaq Namminersorlutik Oqartussat Nuna Minerals A/S-imi aktiaatinik ikinnerussuteqartumik taamaallaat pigisaqarmata.

5.

Government take model-imut nutaamut tunngatillugu iliuusissiamut atatillugu suli nalorninartorpassuaqarnerarlugu ingerlatsiveqarfiup "KPMG"-p oqaaseqarnerannut Naalakkersuisut qanoq isumaqarpat?

Akissut

Naalakkersuisut Kukkunersuisarnermut ingerlatseqatigiiffik PwC aamma Lett Eqqartuussissuserisut suliffeqarfiat suleqatigalugit royalty-mik naatsorsuinermit ilusilianik suliaqarput, isumaqaratillu taakkua pissutsinik paasinarsisinneqarsimanngitsunik imaqartut. Akileraartarnermut inatsimmut tunngatillugu taanna ingerlaavartumik pitsanngorsarneqartuarpoq.

Inussiarnersumik inuulluaqqusillunga
Med venlig hilsen


Jens-Erik Kirkegaard